


DECLARATION

DV ROY, PAR LAQUELLE
tous les habitans & autres personnes qui
sont de present és villes de la Rochelle &
S. Iean d'Angely, & tous ceux qui les fauo-
riferont, sont declarez Criminels de leze
Majesté: Avec inunction à tous ses sub-
jets de la Religion pretenduë reformee,
de faire protestation de n'adherer en au-
cune sorte à l'assemblée de ladite ville de
la Rochelle, ny à toutes autres qui se sont
tenuës & tiennent sans expresse permis-
sion de sa Majesté.

Publiee en Parlement le 7. Iuin 1621.



A PARIS,
Par FED. MOREL, & P. METTAYER,
Imprimeurs ordinaires du Roy.

M. D C X X I.

Avec Privilege de sa Maiefté.

ACC 83-101(271)



OVIS PAR LA
 GRACE DE DIEV,
 ROY DE FRANCE
 ET DE NAVARRE, A
 tous ceux qui ces presentes Lettres
 verront, Salut. Le desir que nous
 auons tousiours eu de conseruer le
 repos & la tranquillité publique par-
 my nos subjets, & d'empescher les
 maux & desolations que la leuee des
 armes apporte ordinairement, & les
 oppressions & calamitez que les peu-
 ples en reçoient, Nous a faict tole-
 rer & souffrir avec beaucoup de pa-
 tience depuis plusieurs mois en ça les
 excez, desobeissances & rebellions

qui ont esté commises en plusieurs villes de nostre Royaume par aucuns de nos subjets, faisans profession de la Religion pretendue reformee, mesmes en celles de la Rochelle, Montauban & autres, où se sont re-nues & se tiennent encores des As-semblees illicites, qui se sont pluystost employees à former des estats popu-laires & republicques, qu'à se conser-uer dans l'obeissance à laquelle ils nous sont naturellement obligez, Ayans mesmes fait & grauer vn Sceau, souz lequel & souz les signatures des principaux desdites Assemblees, ils ont lasché diuerses Ordonnances, decrets, mandemens & commissions portans pouuoirs à des particuliers de commander aux Prouinces & Vil-les, leuer les deniers de nos Finances & receptes, faire leuees d'hommes, d'armes & d'argent: fondre canon,

enuoyer aux Prouinces & Royaumes
 estrangers, & autres semblables a-
 ctions qui font assez paroistre vne
 entiere rebellion & souleuation ou-
 uerte contre nostre auctorité: De-
 quoy ayans eu quelque cognoissance
 dès le mois d'Auril dernier, Et sça-
 chant qu'ils prenoient pretexte de se
 porter à ces desordres, par le peu de
 seureté qu'ils disoient auoir de leurs
 personnes, & de la liberté de leurs
 consciéces, Nous voulusmes par no-
 stre Declaration du vingt-quatries-
 me dudit mois d'Auril leur donner
 toute assurance de nos inclinations
 à l'endroit de ceux qui demeureroiét
 en leur deuoir: & les prenans en no-
 stre protection & sauuegarde parti-
 culiere, faire cognoistre que le voya-
 ge que nous nous preparions de faire
 en ces quartiers de deça estoit plus-
 tost pour nous, approchans des lieux

où ces insolences se commettoient, y
 restablir & faire paroistre nostre au-
 ctorité à la confusion de ceux qui se
 trouueront coupables, Que pour
 vser d'autre plus grande rigueur, ny
 nous seruir du pouuoir que Dieu a
 mis en nos mains pour le chastiment
 de telles insolences. Mais tant s'en
 faut que cela leur ait ouuert les yeux
 pour les ramener à ce qui est de leur
 deuoir, que la plus part d'entre-eux
 continuans en leurs mauuaises vo-
 lontez se portent ouuertement à la
 rebellion, & mesmes commettent
 toutes sortes d'hostilitez contre ceux
 qui n'y adherent avec eux: Publians
 ne recognoistre autre chef que l'As-
 semblee qui est dans la Rochelle,
 Laquelle a faict à present retrouver à
 saint Iean d'Angely plusieurs gens
 de guerre leuez souz leursdites Com-
 missions qui font contenance de se

vouloir opposer à nostre passage dās
 ladite ville, & nous en vouloir em-
 pescher l'entree par la force des ar-
 mes. Ce qui nous oblige voyant mes-
 me que ce desordre est suiuy en plu-
 sieurs autres villes de nostre Royau-
 me, de nous mettre en estat d'en cha-
 stier les auteurs selon leurs demeri-
 tes, & d'employer à cet effect avec les
 voyes ordinaires de la Iustice, les
 moyens que Dieu a mis en nos mains
 pour la manutention de nostre au-
 ctorité. Et afin que tous nos sujets &
 specialement ceux qui font profes-
 sion de ladite Religion pretendue
 reformee ne puissent estre abusez du
 faux pretexte dont ladite Assemblée
 se sert pour les destourner de leur de-
 uoir, Et que les vns & les autres soient
 informez de nos intentions & vo-
 lontez sur ce sujet; N o u s de l'aduis
 des Princes, Ducs, Pairs, Officiers de

nostre Couronne, & principaux de
 nostre Conseil, A V O N S dit & de-
 claré, disons & declarons par ces pre-
 sentes, Qu'en confirmant nosdites
 Lettres patentes dudit vingt-quatrié-
 me d'Auril dernier, Nous auons pris
 & mis, prenons & mettons en no-
 stre protection & sauuegarde spe-
 ciale, tous nos sujets de ladite Reli-
 gion pretendue reformee, de quel-
 que qualité & condition qu'ils soient
 qui demeureront & se contiendront
 dans nostre obeissance, & sous l'ob-
 servation de nos Edicts, lesquels nous
 voulons aussi faire soigneusement
 obseruer en leur faueur. M A I S
 voyans les rebellions manifestes qui
 se commettent en nostredite ville
 de la Rochelle, tant par l'assemblee
 qui y est tousiours subsistante contre
 nos defenses expresses, que par le
 corps de ville, Bourgeois & habi-
 tans

sans d'icelle, comme aussi ce qui se
 passe en nostre ville de saint Iean
 d'Angely, & les actes d'hostilité qu'ils
 commettent iournellement contre
 nostre propre personne, N o u s
 auons declaré & declarôstous les ha-
 bitans & autres personnes de quelque
 qualité qu'ils soient qui sont à present
 demeurans, refugiez ou retirez dans
 la Rochelle & saint Iean d'Angely,
 & tous autres qui les fauoriseront di-
 rectement ou indirectement, & qui
 auront accez, intelligence, associa-
 tion & correspondance avec eux,
 ou qui recognoistront en quelque
 sorte que ce soit ladite assemblée de
 la Rochelle, ou les autres assemblees,
 cercles, abregez, cōseils de Prouinces,
 ou autres congregatiōs qui ont corre-
 spondance avec celle de la Rochelle,
 & qui se tiennent sans nostre expres-
 se permission, relaps, refractaires,

desobeïssans & criminels de lezeMa-
 jesté au premier chef, & comme tels
 leurs biens nous estre acquis & con-
 fisque: V O U L A N S qu'il soit pro-
 cedé contre eux selon la rigueur des
 Loix & Ordonnances, par saisies de
 leurs personnes, annotations de
 leursdits biens, & autres voyes ordi-
 naires & accoustumees en tel cas:
 Declarans aussi nosdictes villes de
 saint Iean d'Angely, la Rochelle, &
 toutes autres qui leur adhereront &
 se porteront avec elles aux mesmes
 crimes & desobeïssances, priuees &
 descheuës de tous octrois, priuileges,
 franchises & autres graces qui leurs
 pourroient auoir esté concedees par
 les Roys nos predecesseurs ou par
 Nous. Et afin que nous puissions di-
 scerner & recognoistre les bons d'a-
 uec les mauuais, Nous voulons que
 tous nosdits sujets faisans professio

de ladite Religion pretenduë Reformee, Tant Gentils hommes que autres de quelque qualité qu'ils soient, & mesmes les Villes & Communautés de ladite qualité, facent Declaration dans les Sieges Presidiaux, Bailliages & Seneschauſſees de leur ressort, des bonnes intentions qu'ils auront à nostre ſeruiſſe, Et qu'en icelles ils facent renonciations & deſadueuz, & proteſtent de n'adherer en aucune ſorte à ladite aſſemblée de la Rochelle, ny à toutes autres aſſembles, conſeils de Prouinces, abreges, cercles, & autres qui (comme dit eſt) ſe ſont tenus & tiennent ſans noſtre permiſſion expreſſe, & qu'ils ſe veulent oppoſer avec Nous à toutes les reſolutions qui y pourroient auoir eſté priſes, dont ils retireront les actes qui pourront eſtre neceſſaires à leur deſcharge: Comme auſſi Nous de-

fendons tres-expressément à tous Gentils-hommes & autres de permettre à leurs enfans , domestiques ou autres dependans d'eux , d'aller dans lesdites Villes , ny y prester confort & assistance aucune , ny donner logement ou retraicte dans leurs maisons à ceux qui iront ou conuerferront en quelque façon que ce soit, sur peine d'estre tenus coupables de mesme crime. MANDANT & enjoignant tres-expressément à tous Baillifs , Seneschaux , Preuosts , Iuges ou leurs Lieutenans , Vis-seneschaux , Preuosts de nos Coufins les Connestable & Mareschaux de France, Et à tous nos autres Officiers qu'il appartiendra , de proceder exactement & soigneusement contre les personnes & biens de ceux qui auront encouru ledit crime , & à nos Procureurs generaux & leurs Substi-

turs , de faire sur ce les poursuites, requisi-
tions & diligences qui dependen-
tent de leurs charges , sans auoir es-
gard à aucunes sauuegardes ou au-
tres assurances qu'ils pourroient a-
uoir obtenues de Nous sous faux
donné à entendre ou autrement , si
ce n'est que lescdites sauuegardes fus-
sent en Lettres patentes , seellées de
nostre grand Sceau , Et que dans icel-
les il fut expressément exposé la per-
mission que nous leur aurions donnée
d'aller ou frequenter dans lescdites
villes rebelles.

SI DONNONS EN MANDEMENT
à nos amez & feaux , Les gens tenans
Nos Cours de Parlement & Cham-
bre de l'Edict , Que ce presentes nos
Lettres de Declaration , ils facent li-
re , publier & enregistrer , chacun en-
droit soy : Et le contenu en icelles
garder & obseruer exactement selon

sa forme & teneur. Enioignans à nos
Procureurs Generaux & leurs Sub-
stituts d'y tenir soigneusement la
main , Et de faire toutes poursuites
& diligences pour ce requises & ne-
cessaires : C A R tel est nostre plaisir.
E N T E S M O I N de quoy nous auons
faict mettre nostre seal à celsdites pre-
sentes.

D O N N E E S à Nyort le vingt-se-
ptiesme iour de May, l'an de grace
mil six cens vingt & vn, & de nostre
regne le douziesme.

Signées, L O V I S.
Et sur le reply, Par le Roy.

D E L O M E N I E.

Et sceelées du grand seau de cire
iaune sur double queue.

Et sur ledit reply est encore escrit :

*Leuës, publiees & Registrees, ouy &
cerequerä: le Procureur General du Roy,*

Et ordonné que coppies d'icelles collation-
nées seront enuoyées aux Bailliages &
Seneschauſſees de ce reſſort, pour y eſtre
ſemblablement leuës, publiees, regiftrées,
& executees. Enjoint aux Subſtituts
dudit Procureur General tenir la main
à l'exécution d'icelles, & en certifier la
Cour au mois, à peine d'en reſpondre en
leur propre & priuë nom. A Paris en
Parlement le ſeptième Iuin mil ſix cens
vingt-vn.

Signé,

DV TILLET.

Sommaire du Priuilegē.

PAR Lettres patentes du Roy, données à Paris le vingt-deuxiesme iour de Feurier, mil six cens vingt, signees LOVIS, & sur le reply, Par le Roy, DE LOMENIE, & scelees du grand seel dudit Seigneur, en cire iaulne, sur double queue : verifiees, tant en la Cour de Parlement, Chambre des Comptes, Cour des Aydes, Chastelet de Paris, qu'au Bailliage du Palais: Il est permis à Federic Morel, & Pierre Mettayer ses Imprimeurs ordinaires, d'imprimer, ou faire imprimer, vendre & debiter tous Edicts, Ordonnances, Mandemens, Lettres patētes, comme aussi tous Arrests, tant de son Conseil, que de ses Cours, sans qu'aures Libraires & Imprimeurs les puissent imprimer ne faire imprimer, vendre ne distribuer, en quelque sorte & maniere que ce soit, sur peine de cinq cens liures d'amende. Voulant au surplus, que tout ce qui se trouuera imprimé de ce que dessus, parauttes que lesdits Morel & Mettayer, soit saisi & cancelé comme nul & faulx, & fait contre son auctorité & commandement.

